

ILUARSIISSUT

**Ataatsimiititaliap isumaliutissiissutaa 1. juni 2019-imik ullulik taarserpaa.
(Akileraarutitigut ilanngaatinik kingullermik allanngortitsinermit ukiuliussamik, 2015-
imi pinnani 2005-imi pisimasumut iluarsiiisut)**

**2019-imi akileraarutitigut ilanngaatissat il.il. imatut angissusilerneqarnissaannik
Inatsisartut aalajangiinissaannik siunnersuut:**

1. Inummut ilanngaat	kr.	48.000 (ukiumut)
2. Ilangaat aalajangersimasoq	kr.	10.000 (ukiumut)
3. Aningaasarsiat B-t akileraaruteqaataasusaaanngitsut	kr.	5.000 (ukiumut)
4. Killilimmik akileraartussaataasut ilanngaataat	kr.	1.000 (ukiumut)
5. Kommunitut ataatsimut akileraarut		6%
(Aningaasaqarnermut Nunanilu Avannarlerni suleqatigiinnermut Naalakkersuisoq)		

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq
 Inatsisartunut ilaasortaq Peter Olsen, Inuit Ataqatigiit, siulittaasup tullia
 Inatsisartunut ilaasortaq Karl Kristian Kruse, Siumut
 Inatsisartunut ilaasortaq Henrik Fleischer, Siumut
 Inatsisartunut ilaasortaq Múte Bourup Egede, Inuit Ataqatigiit
 Inatsisartunut ilaasortaq Randi V. Evaldsen, Demokratit
 Inatsisartunut ilaasortaq Jens NapátôK', Partii Naleraq

Ulloq 30. april siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Naalakkersuisut siunnersuutigaat 2020-imut akileraarutitigut ilanngaatissat il.il. 2019-imut sannilliullugit allannguuteqassanngitsut. Tamatuma peqatigisaanik kommuninut ataatsimut akile-

raarut allanngortinneqassanngitsoq siunnersuutigineqarpoq. Ilanngaait il.il. ataasiakkaat erseqqinnerusumik eqqartorneqarnerat, atuuffii kiisalu ukiuni siusinnerusuni angissusilerneqarsimani eqqarsaatigalugit ilanngussaq 1 innersuussutigineqarpoq, soorlutaaq 2020-imi aningaasarsiat tunngavissaattut naatsorsuutigisat ilanngussaq 2-mi nassuiaatigineqartut.

2. Siunnersuutip Inatsisartunit siullermeerneqarnera

Siunnersuut amerlanerussuteqartunik taperserineqarnerasoq akerlerineqarnerosorluunniit siullermeerinninnermi erseqqissumik oqariartuutigineqanngilaq. Siunnersuut aappassaaneerneqar-nissani sioqqullugu Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

3. Tusarniaanermi akissutit

Naalakkersuisut ima paasissutissiipput:

”Siunnersuut nunatsinni kommuninut tusarniaassutigineqareerpoq. Kommuneqarfik Sermersooq kisiartaalluni tusarniaanermi akissuteqarpoq. 2020-mi kommuninut ataatsimut akileraarutissap allanngortinnagu 6 %-imik angissusilerneqarnissaa Kommuneqarfik Sermersuup isumaqataaffigaa.”

4. Ataatsimiititaliap siunnersuummik suliarinninnera

Inuit akileraarutaat ingerlatseqatigiiffillu akileraarutaat ilanngullugit akileraartarnermik iluarsaaqqinnissap pisariaqartinneqarnera, taamatullu suliassaqaqfinni allani innuttaasut inuuniarnerminni nalinginnaasumik atugaannut pingaarutilinni iluarsaaqqinnissamik pisariaqartitsineq ataatsimiittarfimmi oqallinnermi assut initusut ataatsimiititaliamit aallarniutigalugu maluginiarneqarpoq.

Kiisalu sulinerup imminut akilersinnaanissaa akileraartarnikkut qulakkeerinneqataaffigineqassasoq oqaatigineqarpoq, tassungalugu atatillugu ilanngullugu oqaatigineqarluni suliner-mut tapiissummik imaluunniit suliner-mut ilanngaammik pisariaqartitsisoqartoq. Tamanna pillugu siunnersuummik kingusinnerusukkut saqqummiussinissaq naatsorsuutigineqartoq Naalakkersuisut paasissutissiissutigaat.

Inummut ilanngaait malunnaatilimmik qaffanneqarnissaanik siunnersuuteqarnissaq piaartu-mik sukumiisumik isumaliutigineqartariaqartoq Naalakkersuisunut tigussaasumik kaammattutigineqarpoq. Siunnersuut taamaattoq isertitakinner-nut akunnattumillu isertitalinnut iluaqutaassaaq aammalu isertitaqarnerpaat isertitakinnerpaallu akornanni assigiinn-gissummut annikillisaqataassalluni. Taama kissaateqarnermut tunuliaqutaavoq ilanngaait akit ineriartornerannut malinnaasimanginnerat aammalu inuiaqatigiit aningaasaqarnerata aatsaat taama pitsaatigilerneqarnera. Tassunga atatillugu akileraarutitigut ilanngaait 2005-imiilli allannguuteqartinneqarsimanginnerat tunngavilersuutigalugu siunnersuut maanna ilusimisut iluseqartoq tapersersornartinneqanngitsoq oqaatigineqarpoq.

Naalakkersuisut siunnersuutaannut allannguutissatut siunnersuummik tigussaasumik saqqummiussisoqarsimangitsoq ataatsimiititaliamit oqaatigineqassaaq. Tamatumalu peqatigisaanik

siunnersuutip allannguutissatullu siunnersuutip assigiinnissaannik ilusiliinissamut piumasaaqat pissutigalugu kissaaterpassuit siunnersuummik siullermeerinninnermi saqqummiunneqartut pillugit allannguutissatut siunnersuuteqarnissaq ajornartoq ataatsimiititaliamit oqaatigineqassaaq. Iluarsaaqqinnernik annertuunik assigiinngitsunik suliaqarneq ataatsimiititaliap isumaa malillugu allamut atatillugu ingerlanneqartariaqarpoq. Tassunga atatillugu ataatsimiititaliamit oqaatigineqassaaq inuit akileraarutaat ingerlatseqatigiiffiillu akileraarutaat ilanngullugit akileraartarnernik iluarsaaqqinnissaq assut pisariaqartinneqartoq siunnersuummik siullermeerinninnermi oqaatigineqarmat, soorluttaaq suliaasaqarfinni allani innuttaasut inuuniarnerminni nalinginnaasumik atugaannut pingaarutilinni iluarsaaqqinnissamik pisariaqartitsineq oqaatigineqartoq. Siunnersuutip matuma naliliiffigineqarneranut atatillugu tamanna assut pisariaqartoq ataatsimiititaliaq isumaqarpoq, tassami allannguutissatut siunnersuuteqarnissamik kissaataasinnaasut nunatta karsiata aningaasaqarneranut assut sunniuteqarsinnaammata. Ataatsimiititaliaq isumaqarpoq nunatta karsiata aningaasaqarnera pillugu oqariartuutit imminnut assortuuttut. Ataatsimiititaliaq UPA2019/20-imik aappassaaneerinnereermermi ilisimatitsissutitut allakkiamik ajoraluartumik isertuussassamik Naalakkersuisunit tigusaqarpoq. Tassani Naalakkersuisut ilisimatitsillutik naalagaaffimmit ataatsimoortumik tapiissutit akit akissarsiallu malillugit iluarsiissuteqarfigineqareeraluurtulluunniit aningaasanut inatsisissatut siunnersuutissami ukiunilu missingersuusiorfusuni 100 millionilikkaanik amigartooruteqarujussuarnissaq naatsorsuutigineqartoq. Soorunami amigartoorut taanna, aningaasanut inatsisissamut aggersumut aningaasartuutissamik allanik ikkusisoqarsinnaalinnginnerani matussuserneqaqqaartariaqarpoq. Amigartoorut taama annertutigi-soq Aningaasaqarnermut Akileraartarnermullu Ataatsimiititaliamut ilaasortanit ilisimaneqarsimangilaq, taamatuttaaq Inatsisartunit tamanit. Taamaammat ataatsimiititaliap siunnersuutip maannakkutut iluseqartup akuersissutigineqarnissaa inassutigaa, peqatigitilluguli akileraartarnikkut nutarterinissamik suliaqarnerup piaarnerpaamik siuarsarneqarnissaannik ujartuilluni.

Siuliani allassimasut tunngavigalugit isumaliutissiissuteqannginnermini apeqqutit uku akineqarnissaat ataatsimiititaliamit kissaatigineqarpoq:

- Ilanngaait akissarsiat akillu ineriartornerannut malinnaatinneqarsimagaluarpata ilanngaait assigiinngitsut aningaasartaat 2020-mi qanoq annertussuseqarsimassagaluarpat?
- Tamanna aningaasaqarnikkut qanoq kinguneqarsimassagaluarpa?
- 2020-mut aningaasalersuineq qanoq issimassagaluarpa?

Naalakkersuisut allakkatigut akissutaat isumaliutissiissummut matumunnga ilanngussatut ilanngunneqarpoq. Ataatsimiititaliap apeqqutaanut Naalakkersuisut akissutaat tunngavigalugu siunnersuutip matuma taparserneqarnissaa ataatsimiititaliap isumaqatigiittup kissaatigaa. Kiisalu akileraartarnikkut iluarsaaqqinnerup sivisuumik utaqqineqartup Naalakkersuisunit piaartumik siuarsarneqarnissaa ataatsimiititaliamit inassutigineqarpoq.

5. Siunnersuutip aningaasaqarnikkut kingunerisassai

Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut Aningaasaqarnermut Akileraartarnermullu Ataatsimiititaliaq oqaaseqaatissaqanngilaq.


6. Ataatsimiititaliap inassuteqaataa

Ataatsimiititaliap isumaqatigiittup qulaani allassimasut tunngavigalugit siunnersuutip **akuersissutigineqarnissaa inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Hermann Berthelsen,
siulittaasoq



Peter Olsen




Karl Kristian Kruse



Henrik Fleischer



Múte Bourup. Egede



Randi V. Evaldsen



Jens NapátôK'



**Aningaasaqarnermut Nunanilu Avannarlerni
suleqatigiinnermut Naalakkersuisoq**

Ulloq: 25. maj 2019
J.nr.: 01.31.11/FM19-LABU-00012

**Oqaluuserisassani UPA 2019/12-imut Aningaasaqarnermut Akileraartarnermullu
Ataatsimiititaliap apeqquai.**

Immikkoortoq siuliani allassimasoq pillugu isumaliutissiissuteqannginnermini apeqquait uku
akineqarnissaat ataatsimiititaliamit kissaatigineqarpoq:

- Ilanngaait akissarsiat akillu ineriartornerannut malinnaatinneqarsimagaluarpata ilanngaait assigiinngitsut aningaasartaat 2020-mi qanoq annertussuseqarsimassagaluarpat?
- Tamanna aningaasaqarnikkut qanoq kinguneqarsimassagaluarpa?
- 2020-mut aningaasalersuineq qanoq issimassagaluarpa?

Inussiarnersumik

Hermann Berthelsen

Aningaasaqarnermut Akileraartarnermullu Ataatsimiititaliamut Siulittaasoq



Aningaasaqarnermut Akileraartarnermullu Ataatsimiititaliaq /Maani

Aningaasaqarnermut Akileraartarnermullu Ataatsimiititaliap UPA 2019/12-imut atatillugu apeqputai.

Brevdato: 28-05-2019
Sags nr. 2019-177

Immikkoortoq siuliani allassimasoq pillugu isumaliutissiissuteqannginnermini apeqputit matuma kinguliani allassimasut akissuteqarfigineqarnissaat Aningaasaqarnermut Akileraartarnermullu Ataatsimiititaliap kissaatigaa:

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

- Ilanngaatit akissarsiat akillu ineriartornerannut malinnaatinneqarsimagaluarpata ilanngaatit assigiinngitsut aningaasartaat 2020-mi qanoq annertussuseqarsimassagaluarpat?
- Tamanna aningaasaqarnikkut qanoq kinguneqarsimassagaluarpa?
- 2020-mut aningaasalersuineq qanoq issimassagaluarpa?

Aallarniutigalugu oqaatigissavara ataatsimiititaliap isumaliutissiissuteqannginnermini paasisaqarnerujumaneq siunertaralugu ataatsimiititaliaq Naalakkersuisunit saaffiginnimmat Naalakkersuisunit assut iluarisimaarneqarmat.

Ataatsimiititaliat aalajangiinissaminni sapinngisamik pitsaanerpaamik tunngavissaqarnissamik qulakkeerinninnissaq assut pingaaruteqartut Naalakkersuisunit isigineqarpoq, aammalu ataatsimiititaliat sulineranni taamatut ikorfartuinissamik akisussaaffeqarnertik Naalakkersuisut ilisimaarilluinnarpaat.

Ataatsimiititaliani suliassaqarpallaarnerup ataatsimiititaliat isumaliutissiissusiunnginnerminni attuumassuteqartunik ajoraluartumik ilaatigut apeqquteqanngitsoorarterat Naalakkersuisunit ilaatigut misigineqartarpoq, taamaalillunilu kingusinnerusukkut pissutsit assigiinngitsut akissuteqaatini Naalakkersuisunit erseqqinnerusumik nassuiaateqarfigineqarnissaannik naatsorsuutiginninnermik ataatsimiititaliat isumaliutissiissutaat tunngaveqaratarsinnaallutik.

Kingulliullugu taaneqartumut atatillugu ataatsimiititaliat paasissutissanik kissaataat Naalakkersuisunit soorunami naammassiniarneqassapput, isumaliutissiissutilli amerlanerpaartaat siunnersuutit oqaluuserineqarnissaat sioqqutitsiaannarlugu tunniunneqartarmata paasissutissat ataatsimiititalianit kissaatigineqartut naammagintarmatik annertussusilimmik pissarsiarinissaannut pitsaassusissaannillu qulakkeerinninnissamut Naalakkersuisut akuttunngitsumik piffissaalatsisarput.

Taamatut pisoqartillugu paasissutissat ataatsimiititalianit kissaatigineqartut kingusinnerusukkut Naalakkersuisunit nassiunneqartariaqarsinnaasarput.

Tamatuma kingorna ataatsimiititaliap apeqputai aalajangersimasut tunngavigalugu Naalakkersuisunit makku paasissutissiissutigineqassapput:

Piffissami 2005-imit 2020-mut akigititat akissarsiallu iluarsisutaasa ineriartornerat katillugu 28,8%-it missaanniippoq.

Tamanna isumaqarpoq 2020-mi ilanngaait piffissami 2005-imit 2020-mut akigititanut akissarsianullu siuliani allassimasunut tamarmiusunut, tassalu 28,8 %-imik malinnaatinneqaraluarpata ima annertussuseqarsimassagaluarput:

- Inummut ilanngaait 13.800 kr.-t missaannik qaffasinnerussagaluarpoq,
- ilanngaait aalajangersimasooq 2.900 kr.-t missaannik qaffasinnerussagaluarpoq aamma
- aningaasarsiat B-t akileraarutaasussaangitsut 1.450 kr.-t missaannik qaffasinnerussagaluarput.

Ilanngaait annertussusiinik taama allannguisoqassappat tamanna inuiaqatigiinni 2020-mi akileraarusersuinnikkut tunngavigisaq ilanngaait annertussusiinut allannguteqanngitsunut sanilliullugu 700 mio. kr.-t missaannik annikinnerusimassagaluarpoq.

Ilanngaait annertussusaannik qaffaanerup aningaasalersorneqarnissaa eqqarsaatigalugu tamatumunnga assersuutitut oqaatigisinnaavara akileraarutit procentiannit Nunatta Karsia ullumikkut 96,1 mio. kr.-nik iluanaaruteqartarmat. Matumani maluginiarneqassaaq akileraarutit agguataarneqarmata Nunatta Karsianut 25 %-it missaannik kommuninullu 75 pct.-it missaannik. Iluanaarutitigut taama annaasaqarneq assersuutigalugu pisortat atueriaasiannik allannguinikkut sipaaruteqarnikkullu, akitsuutinik qaffaanikkut imaluunniit toqqaannartumik akileraarutit annertusinerisigut aningaasalersorneqarsinnaassapput.

Ilanngaait annertussusaannik nassuiaatigineqartutut qaffaasoqarneratigut aningaasaqarnikkut kingunerisassaaq tassaassaaq Nunatta Karsiata iluanaarutai ukiumoortumik 75 mio. kr.-t missaannik kommunillu iluanaarutaat 225 mio. kr.-t missaannik ikileriaateqassammata.

Ataatsimiititaliap apeqqutaanut taama akissuteqarlunga ataatsimiititaliap isumaliutissiisutaa qilanaaraara.

Tassunga atatillugu erseqqissaatitut eqqaasitsissutigissavara aalajangiiffigisassatut siunnersuut matumani pineqartoq aningaasarsianit akileraarutit pillugit inatsimmi aalajangersakkat naapertorlugit ukiup affaani siullermi Inatsisartut ataatsimiinneranni akuersissutigineqassammata.

Inussiarnersumik inuulluaqqusillunga


Vittus Qujaukitsoq